


# Zemzem

Islamski godišnjak Zemzem na bosanskom jeziku, broj 1, mjesec zul-hidždže 1432- novembar 2011.



باللغة البوسنية  
توزع مجاناً  
Poklon koji  
se ne prodaje

Bosanski jezik



## Uvod

السلام عليكم ورحمة الله وبركاته

Zaista, svaka zahvala pripada Allahu Uzvišenom koji je omogućio da islamski časopis-godišnjak Zemzem, namijenjen hadžijama bosanskog govornog područja, ugleda svjetlo dana. Časopis Zemzem će obrađivati poznate islamske teme, kroz prizmu Kur'ana i sunneta. Neke od tema su: Kur'an, akida, hadis, fikh, islamska porodica, ashabi, tevhid, islamski odgoj, žena muslimanka isl.

Islamski godišnjak Zemzem se smatra simboličnim poklonom svakom našem hadžiji sa nadom da će se okoristiti od njega i potom naučeno primjeniti u svome životu kao i da će pokloniti časopis, poslije njegovog čitanja, drugoj osobi sa ciljem da se i drugi okoriste. Rekao je Božiji Poslanik: «Onome, koji ukaže nekom na dobro, pripada ista nagrada onoga koji ga uradi». (Muslim) I na kraju, također se zahvaljujemo svakom onom koji je dao svoj doprinos u izdavanju godišnjaka Zemzem a posebno «Mekteb Teavuni» - ured za međusobno potpomaganje na jugu Mekke Mukaerreme, sa nadom da časopis Zemzem nastavi sa svojim izdavanjem.

Molimo Uzvišenog Allaha da ovaj rad učini iskrenim radi Njega i da ga stavi na vagu naših dobri djela. Amin!



للكتب التعاونية للدعوة والإرشاد  
وتوعية المجالس بجنوب مكة





Allah Is One

# SAMO ALLAHU PRIPADAJU LIJEPA IMENA

**U**istinu, samo Allahu pripadaju lijepa imena i uzvišena svojstva. On Svevišnji je rekao: “I samo Allahu pripadaju najljepša imena pa Ga dozivajte njima, a klonite se onih koji iskrivljivaju Njegova imena. Kako budu radili, tako će i biti nagrađeni!” ( El-Eḡaraf, 180.)

Sva Allahova imena su lijepa i u svojoj ljepoti dostižu vrhunac!

Stoga Allahov robe:

1. Upoznaj svoga Gospodara, subhanehu ve teḡala, izučavaj Allahova imena i Njegova svojstva. On Uzvišeni je rekao: “I znajte da Allah zna ono što je u vašim dušama, pa Ga se čuvajte! I da znate da je Allah nad svim moćan i da Allah sve

obuhvata Svojim znanjem!” ( Et-Talak, 12.)

2. Dozivaj Uzvišenog Allaha Njegovim imenima, spominji ih u dovi Njemu, subhanehu ve teḡala, jer je On Svevišnji i rekao je : “I samo Allahu pripadaju najljepša imena pa Ga dozivajte njima, a klonite se onih koji iskrivljivaju Njegova imena. Kako budu radili, tako će i biti nagrađeni!” ( El-Eḡaraf, 180.)

3. Dobro se upoznaj s hadisom Allahova Poslanika, sallallahu alejhi ve sellem, u kojem kaže: “Doista, Allah ima devedeset devet imena, stotinu manje jedno, ko ih nauči, ući će u Džennet“. ( Buhari ). Ako si u mogućnosti da se upoznaš s devedeset devet Allahovih imena, to učini, odnosno:

1. Nauči ih napamet, jer je Vjerovjesnik, sallallahu alejhi ve sellem, rekao: “Ko ih

nauči ući će u Džennet!”

2. Spoznaj njihova značenja koliko si u mogućnosti.

3. Dozivaj Allaha, subhanehu ve teala, njima, odlikuj se onim osobinama kojima je dozvoljeno da se i čovjek odlikuje poput: milosti, plemenitosti, oprosta a dobro se čuvaj onih osobina koje su svojstvene samo Allahu, subhanehu ve teala, i nikako ih sebi ne prizivaj poput: uzvišenosti, gordosti i sl.; nastoj da spoznaja i vjerovanje u Allahova imena ostave traga na tebe.

4. U svome namazu, na sedždi, traži utočište u Allahovom zadovoljstvu od Njegove srdžbe, u Allahovom oprostom od Njegove kazne, jer je došlo u hadisu Aiše, radijallahu anha, da je rekla: “Jedne noći, nestao mi je Allahov Poslanik, sallallahu alejhi ve sellem, iz postelje, pa sam ga potražila i moja ruka je pala na njegove tabane. Bio je na sedždi. Stopala su mu bila uspravljena. Učio je: <Allahu moj, utječem se s Tvojim zadovoljstvom od Tvoje srdžbe, s Tvojim oprostom od Tvoje kazne, s Tobom od Tebe! Ja nisam u stanju da pobrojim Tvoje blagodati i na njima se zahvalim, Ti Si onakav kako Si sam Sebe pohvalio!>” (Muslim)

5. Znaj da Allahova imena nisu ograničena, njima nema broja, pa kada te spopadne briga i tuga, u svojoj dovi reci kako je došlo u hadisu Abdullaha koji kaže da je Allahov Poslanik, sallallahu alejhi ve sellem, rekao: “Nikada nikoga neće spopasti briga niti tuga pa da isti kaže:

<Allahu moj, ja sam Tvoj rob, sin Tvoga roba i sin Tvoje robinje, moja kika je u Tvojim ruci, moja stvar je već određena Tvojom presudom, Ti si Pravedan u Svojoj presudi! Ja Te molim svakim Tvojim imenom kojim Si sam Sebe nazvao, ili si njime podučio nekog od Svojih stvorenja, ili si ga objavio u

Svojoj Knjizi, ili si ga ostavio u gajbunepoznatom kod Sebe, molim Te da Kurʿan učiniš procvatom moga srca, svjetlom mojih prsa, prekrivačem moje tuge i odagnačem moje brige, pa će Allah i odagnati njegovu brigu i tugu i umjesto njih mu dati izlaz!” Rečeno je: „Allahov Poslanice, hoćemo li naučiti ovu dovu?!“ „Svakako, neophodno je da svaki onaj koji je čuje da je i nauči!”

(Hadis je sahih)

6. Nastoj da svim dovama koje su došle u Kurʿanu ili vjerodostojnom, hadisu da dozivaš Allaha, subhanehu ve teala.

1. U hadisu Enesa, radijallahu anhu, spominje se da je rekao: „Dova koju je najčešće Allahov Poslanik, sallallahu alejhi ve sellem, učio bila je:

“Allahu, Gospodaru naš, podari nam na dunjaluku dobro i na ahiretu dobro i sačuvaj nas džehennemске kazne.”) Buhari)

2. Također, Enes, radijallahu anhu, prenosi da je Allahov Poslanik, sallallahu alejhi ve sellem, često učio: “O Ti koji okrećeš srca, učvrsti moje srce na Tvojim vjeri!” Rekao sam: „Allahov Poslanice, povjerovali smo u tebe i u ono sa čime si došao, pa da li se bojiš za nas?!“ Rekao je: „Da! Doista su sva srca između dva Allahova prsta, okreće ih kako hoće!”

(Hadis je sahih)

7. Nastoj da što više učiš Kurʿan jer je on Allahov govor. Nastoj da razumiješ njegova značenja, poruke, jer stoji u hadisu Muavije ibn ebi Sufjana, radijallahu anhuma, da je dok je držao hutbu rekao: „Čuo sam Vjerovjesnika, sallallahu alejhi ve sellem, kako kaže: “Kome Allah želi dobro, podari mu razumijevanje vjere! Ja sam samo onaj koji raspodjeljuje, a Allah je Taj koji daje. I neće prestati vjera ovoga (moga) naroda biti ispravna sve dok ne nastupi Sudnji dan ili sve dok ne dođe Allahova odredba!” (Buhari)



# ZNAKOVI ČOVJEKOVE LJUBAVI PREMA ALLAHU

Ljubav prema Allahu sastavni je dio imana. Uzvišeni Allah kaže: „Ima ljudi koji su mjesto Allaha kumire prihvalili, vole ih kao što se Allah voli, ali pravi vjernici još više Allaha vole.” (El-Bekare, 165.) Komentarišući ovaj ajet, jedan učenjak, Allah mu se smilovao, veli: „Ovaj ajet ukazuje na činjenicu da je ljubav prema Uzvišenom Allahu sastavni dio imana (vjerovanja), jer Njegove riječi: „...ali pravi vjernici još više Allaha vole.“, ukazuju da iman pokreće i poziva ljude na ljubav prema Uzvišenom Allahu.

Istinska ljubav prema Allahu oživljava srce i čini ga budnim, a kao rezultat te ljubavi ostaju vidljivi tragovi koji ukazuju da čovjek zaista istinski voli Svoga Gospodara. Mnogo je znakova koji ukazuju na postojanje

čovjekove ljubavi prema Allahu, no mi ćemo ovdje spomenuti samo one najupečatljivije.

Najjasniji i najveći znak čovjekove ljubavi prema Allahu zasigurno je dosljedno slijeđenje Poslanika Muhammeda, sallallahu alejhi ve sellem, a istinsko slijeđenje se ogleda u činjenju onoga što nam je naređeno te u ostavljanju onoga što nam je zabranjeno. U Svojoj plemenitoj Knjizi, Uzvišeni kaže: „Reci: «Ako Allaha volite, mene slijedite, i vas će Allah voljeti i grijehе vam oprostiti.»“ (Ali Imran, 31) Ibn Kesir, Allah mu se smilovao, u komentaru ovog ajeta kaže: „Ovaj plemeniti ajet presuđuje svima onima koji tvrde da vole Allaha, a ne slijede put poslanika Muhammeda, sallallahu alejhi ve sellem. Takvi nisu iskreni, i ne govore istinu sve dok ne

budu slijedili Šerijat sa kojim je došao Poslanik, sallallahu alejhi ve sellem, i njegovu vjeru u svim riječima i postupcima. "Rekao je Hasan el-Basri: „Neki ljudi su tvrdili da vole Allaha, pa ih je Allah iskušao sa ovim ajetom: <Reci: Ako Allaha volite...“

Ako čovjek istinski zavoli Svoga Gospodara onda će zasigurno nastojati da što dosljednije slijedi Njegovog najodabranijeg Poslanika, sallallahu alejhi ve sellem, a nakon što zavoli Allaha onda će osjećati potrebu da Ga stalno spominje. Ovo je ujedno drugi znak čovjekove ljubavi prema Allahu. Spominjanje (zikr) Uzvišenog Allaha jasan je znak da čovjek istinski voli Allaha, koji u Svojoj Knjizi veli: "O vjernici, često Allaha spominjite, i ujutro i naveče Ga veličajte."

(El-Ahzab, 4142-.) I kaže: "Sjećajte se vi Mene i Ja ću se vas sjećati."

(El-Bekare, 152.)

Onaj koji voli veoma često spominje voljenoga. Vjernik koji iskreno voli Allaha ustrajava u svakodnevnom učenju jutarnjeg i večernjeg zikra, on ustrajava u zikru prije i poslije jela, prilikom ulaska u džamiju i poslije namaza, ali je najpredaniji i najustrajniji u najveličanstvenijem zikru od svih, a taj zikr je učenje Kur'ana, Allahovog govora. Ljubav prema Allahovom govoru jasan je pokazatelj ljubavi prema Allahu, jer onaj ko zavoli nekoga onda mu i njegov govor postane drag i srcu blizak.

Onaj ko Allaha zavoli, pa Ga stalno spominje tada Allah njegovo srce pročisti a dušu mu produhovljenom učini i on počne da osjeća slast u pokornosti Uzvišenom Gospodaru.

Osjećaj slasti u pokoravanju Allahu jedan je od znakova iskrene čovjekove ljubavi prema svome Gospodaru.

Kada čovjek Allaha iskreno zavoli tada pokornost Njemu postaje hrana za vjerničko srce u kojoj osoba osjeća neopisivu slast. Baš onako kao što je rekao naš voljeni Poslanik, sallallahu alejhi ve sellem: "Radost moga oka je u namazu." (Hadis je sahih)

Ovaj hadis nedvojbeno ukazuje na prisutnost velike sreće i slasti kod Poslanika, sallallahu alejhi ve sellem, u izvršavanju namaza. Vjernik koji voli Allaha i želi da provjeri da li je njegova ljubav iskrena, treba samo da upita svoje srce da li je ushićeno, sretno i da li osjeća slast prilikom izvršavanja propisanih ibadeta.

Nezamislivo je da srce voli, a da ne želi da se susretne sa voljenim. Onaj ko voli Allaha dž.š. nestrpljivo čeka i čezne za susretom sa svojim Gospodarem. Ljubav i čežnja za susretom sa Uzvišenim Allahom znak je iskrene ljubavi koju potvrđuju riječi Poslanika, sallallahu alejhi ve sellem: "Ko bude volio susret s Allahom i Allah će voljeti susret s njim." (Buhari i Muslim)

Ljubav prema Allahu vjernička je dužnost, a onaj ko iskreno zavoli uočiti će prethodno spomenute znakove, jer će se oni neminovno pojaviti ako je čovjek iskren u svojoj ljubavi, a istinu je rekao jedan islamski učenjak, kada kaže: „Nemoguće je da Ga spoznaš a da Ga ne zavoliš. Nemoguće je da Ga voliš, a da Ga ne spominješ. Nemoguće je da Ga spominješ, a da ne osjetiš slast spominjanja (zikra).“

# POZIV NA HADŽDŽ

**U**zvišeni Allah je naredio Ibrahimu, alejhi-selam, da obznani hadždž među ljudima : “i oglasi ljudima hadždž!” - dolaziće ti pješke i na kamilama iznurenim; dolaziće iz mjesta dalekih.” (El-Hadždž, 27.)

Da li ćeš se ti odazvati ovome plemenitom pozivu ?

## Gosti milostivog

Kada bi nas u goste pozvala neka važna ličnost, zasigurno bismo osjetili zadovoljstvo, bezbjednost i bila bi nam to velika čast. Strahu i nepovjerenju ne bi bilo mjesta u našem “gostovanju”. Da li znamo čiji su gosti hadžije i čija su oni “delegacija”?

Rekao je Allahov Poslanik, sallallahu alejhi ve sellem: “Hadžije i oni koji su došli na umru su Allahova “delegacija” i “izaslanstvo”, pozvao ih je pa su Mu se odazvali, zamolili su Ga pa im je udovoljio.” (Hadis je hasen)

## Brisanje grijeha

Svi smo mi grijешnici. Grijeshili smo prema našem Gospodaru, Njegovom Poslaniku,

sallallahu alejhi ve sellem, našoj braći muslimanima i samim nama. I svaki iskren musliman želi da mu se oprostite njegovi grijesi. Dragi moj brate i cijenjena sestro u islamu , znajte da je hadždž prilika za brisanje naših mnogih grijeha. Rekao je Allahov poslanik, sallallahu alejhi ve sellem: “Ko obavi hadždž, i ne ‘približi’ se ženi, i ne govori nepristojne i ružne riječi, i ne bude kršio (Allahove) propise, vratit će se kao na dan kada ga je majka rodila.» (Mutefekun alejhi)

Plemeni ashab Amr ibn El As dolazi Poslaniku, sallallahu alejhi ve sellem, kako bi mu dao prisegu. Pruža mu svoju ruku, potom je povlači prema sebi. Poslanik ga pita: “Šta je s tobom, o Amr!”, on mu odgovori: “Hoću da uslovim.”, Allahov poslanik, sallallahu alejhi ve sellem, ga zapita: “Šta hoćeš da usloviš?”, Amr mu reče: “Hoću da mi bude oprosteno.” Na to mu Poslanik odgovori: “Zar ne znaš, o Amr, da islam briše ono što je bilo prije njega i da hidžra briše ono što je bilo prije nje i da hadždž briše ono što je bilo prije njega.” (Muslim)



## Ulazak u džennet

Svakako da je najveća želja svakog muslimana da uđe u Džennet i da bude sačuvan od Džehennemske vatre. Želja mu je da bude pozvan da uđe u prostranstva Dženneta i da mu se kaže: “Uđite u njih sigurni, straha oslobođeni!” (El-Hidžr, 4546-.)

Obavljanje hadždža, sa Allahovim dopustom, jedan je od povoda za ulazak u Džennet. Rekao je Allahov Poslanik, sallallahu alejhi ve sellem: “Umra do umre je iskup za ono što je između njih dvije, a za primljen hadždž (hadždž mebrur) nema nagrade osim Dženneta.” (Muttefekun alejhi)

## Najbolje djelo

Često se zapitamo o najboljem djelu u islamu s ciljem da ga činimo i da na taj način zadobijemo zadovoljstvo našeg Gospodara. Obavljeni hadždž je od naboljih djela u vjeri islamu. Allahov poslanik, sallallahu alejhi ve sellem, je bio upitan: “Koje je najbolje djelo?” Pa je odgovorio: «Vjerovanje u Allaha i Njegova poslanika.” Ponovno ga upitaše: “A šta je najbolje poslije toga?” Odgovorio je: “Borba na Allahovom putu.” “A šta je najbolje poslije toga?” Odgovorio je: “Primljeni hadždž (hadždž mebrur).” (Muttefekun alejhi)

## Džihad za žene

Džihad za muškarce u šerijatskoj formi je poznat. A koji je to džihad za žene muslimanke? Možda je ista radoznalost, koja se nalazi u nama, ponukala našu majku Aišu i majku svih pravovjernih, neka je Allah zadovoljan sa njom, pa je upitala Allahovog poslanika, sallallahu alejhi ve sellem: “O Allahov Poslaniče, vidimo da je džihad najbolje djelo, pa zašto da se ne borimo? On joj odgovori: “Najbolji

džihad za vas je primljeni hadždž (hadždž mebrur).” (Buhari)

Poslije Poslanikovog odgovora konstatuje Aiša, neka je Allah zadovoljan sa njom, da neće ostavljati hadždž nakon što je ovo čula od Poslanika, sallallahu alejhi ve sellem. (Buhari)

## Otklanja siromaštvo

Ponekad se pobožimo siromaštva, iako znamo da je Allah Taj Koji opskrbljuje i znamo da je opskrba određena kao naš životni dob, te da neće niko umrijeti dok u potpunosti ne uzme svoju opskrbu. I možda ovaj strah dolazi najviše do izražaja prilikom donošenja odluke za obavljanje hadždža i u toku samog njegovog obavljanja, jer trošimo veliku svotu novaca, a ne vidimo “opipljive” i bliske rezultate. S tim da uopšte nema povoda za pomenuti strah, jer Allah neće iznevjeriti svoje iskrene robove, a naročito u vrijeme obavljanja hadždža, jer je Allahov Poslanik, sallallahu alejhi ve sellem, rekao: “Obavljajte hadždž i umru jedno iza drugoga jer zaista oni otklanjaju siromaštvo i brišu grijeh, kao što mijeh uklanja prljavštinu od zlata i srebra.” (Hadis je sahih)

Komentator Tirmizije je rekao: Moguće je da otklanja “spoljno” siromaštvo sa bogastvom i “unutrašnje” sa bogastvom duše.

## Velika nagrada

Prenosi plemeniti ashab Ibnu Omer, Allah bio njime zadovoljan, da su došla dva čovjeka Allahovom poslaniku, sallallahu alejhi ve sellem, i pitali ga za vrijednost izlaska iz kuće i odlaska u Mekku, vrijednosti dva rekata poslije tavafa, vrijednosti tavafa, stajanju na Afaratu, bacanju kamenčića, tavafu Ifade i o kurbanu. Pa je Allahov Poslanik, sallallahu

alejhi ve sellem, odgovorio: "Kada izađeš iz svoje kuće ciljajući Meku -Sveti hram, neće tvoja deva spustiti ili dignuti stopalo, a da ti Allah neće upisati dobro djelo i izbrisati loše. Tvoja dva rekata poslije tavafa su kao oslobađanje roba od sinova Ismailovih, a tvoj sʔaj između Safe i Merve je kao oslobađanje sedamdeset robova, a tvoje stajanje na Arafatu; pa zaista se Allah spušta na dunjalučko nebo i ponosi se sa vama pred melekima govoreći: 'Moji robovi su Mi došli rasčupani iz mjesta dalekih nadajući se Mojoj milosti. Kada bi njihovi grijesi bili kao broj piješćanih zrnaca, ili kao broj kapljica kiše, ili kao morska pjena zaista bi im oprostio. Idite robovi Moji, vama je oprašteno i onima za koje se zauzmete.' A kod tvog bacanja kamenčića, za svaki kamenčić koji si bacio oprostiće ti se veliki grijeh od onih grijeha koji uništavaju, a tvoj kurban; pa on je čuvan za tebe kod tvoga Gospodara, a tvoje brijanje glave; pa tebi pripada za svaku dlaku koju si obrijao dobro i obrisat će ti se ružno djelo, a tvoj tavaf oko Kabe poslije toga; pa ti ćeš tavafit a nećeš imati grijeha. Doći će ti melek i staviće tvoju ruku između tvojih pleća i reći će ti: 'Radi u vremenu koje je pred tobom, a ono prošlo ti je oprašteno.'" (Hadis je hasen li gajrihi)

### Smrt hadžije

Allahov Poslanik, sallallahu alejhi ve sellem, nas je obavjestio o počastima hadžije ukoliko se desi da preseli na svome plemenitom putu. Obratio se svojim drugovima po pitanju čovjeka kojeg je pregazila njegova deva i koji je umro: "Okupajte ga vodom i "sidrom", stavite ga u ćefine od dva dijela i ne zamotavajte mu glavu, i nemojte ga 'balzamirati'. On će biće proživljen, a učiće telbiju." (Muttefekun alejhi)

### Namaz

Većinu svoga vremena hadžija će provesti u svetim gradovima Mekki i Medini koji posjeduju specifičnosti vezane za obavljanje određenih ibadeta u njima. Rekao je Allah, subhanehu ve te 'ala: "Prvi hram sagrađen za ljude jeste onaj u Mekki, blagoslovljen je on i putokaz svjetovima. U njemu su znamenja očevidna - mjesto na kojem je stajao Ibrahim. I onaj ko uđe u njega treba da bude bezbjedan." (Alu Imran)

Tavaf, sʔaj, boravak na Mini, Arefatu i Muzdelifi, bacanje kamenčića, Revda u Poslanikovom, sallallahu alejhi ve sellem, mesdžidu su obredi ili blagoslovljena mjesta za koja su vezani obredi, koji se ne obavljaju osim u Mekki i Medini. Za svaki pomenuti ibadet došla je nagrada koja se obećava onome ko ga izvrši. Jedan od najvrijednijih ibadeta koji je vezan za Mekku i Medinu je namaz, koji je u njima vrijedniji od namaza u drugim mjestima. Namaz u Mekki je vrijedniji za sto hiljada puta, a u Medini hiljadu puta od namaza u drugim mjestima, kako nas je o tome obavijestio Poslanik, sallallahu alejhi ve sellem. (Buhari i Muslim)





# OSOBE KOJE JE ALLAH PROKLEO

**O**dređene osobe i djela je prokleo Uzvišeni Allah u Plemenitom Kur'anu. Inače, proklestvo u jezičkom značenju jeste protjerivanje i udaljavanje od Allaha ili hajra, dok proklestvo u Šerijatu znači udaljavanje i protjerivanje od Allahove milosti, što je svakako zastrašujuća kazna i zato svaki musliman, koji želi da uspije na dunjaluku i ahiretu, mora da ostavi spomenuta djela.

## Iblis

Proklet je zbog odbijanja da se pokori Allahovoj naredbi, da učini Ademusedžu, zbog svoje oholosti, samodopadanja i zavidnosti prema Ademu, alejhis-selam. Rekao je Uzvišeni Allah: "Prokleo ga Allah! A on je rekao: 'Ja ću se, sigurno, potruditi da preotmem za sebe određen broj Tvojih robova.'" (En-Nisa, 118.)

## Židovi (Benu Israil)

Rekao je Uzvišeni Allah u Svojoj plemenitoj Knjizi: "Reci: 'Hoćete li da vam kažem koji su gori od takvih i koje će Allah još teže kazniti? Oni koje je Allah prokleo i na koje se rasrdio i u majmune i svinje pretvorio, oni koji su se šejtanu klanjali – njih čeka najgore mjesto, jer oni su najdalje s Pravoga puta odlutali.'" (El-Maide, 60.)

Prokleti su zato što nisu vjerovali iako su znali istinu, i zbog skrivanja istine nakon što im je došla, i zbog iskrivljavanja Tivrata i ismijavanja sa vjerom, zatim zbog nepoštivanja ugovora koji je Allah uzeo od njih kada je uzdigao brdo Tur iznad njih, zbog uzdizanja nad Allahovim, subhanehu ve te'ala, položajem, i zbog njihove nepokornosti prema njihovim Poslancima.

## Tajenje jasnih dokaza

Rekao je Uzvišeni Allah: “One koji budu tajili jasne dokaze, koje smo Mi objavili, i Pravi put, koji smo u Knjizi ljudima označili, njih će Allah prokleti, a proklet će ih i oni koji imaju pravo da proklinju.” (El-Bekare, 159.)

Ovaj ajet se odnosi na svakog onog ko taji istinu i ostavlja nepojašnjeno ono što je Allah, subhanehu ve te`ala, učinio obaveznim da se pojasni.

## Vrijeđanje Allaha i Njegovog Poslanika

Rekao je Allah, subhanehu ve te`ala: “One koji Allaha i Poslanika Njegova budu vrijeđali, Allah će i na ovom i na onom svijetu prokleti, i sramnu im patnju pripremiti.” (Ahzab, 57.)

U ovom ajetu “vrijeđanje” je protumačeno sa činjenjem onoga što Allah, subhanehu ve te`ala, i Poslanik, sallallahu alejhi ve sellem, mrze od nepokornosti.

## Činjenje nereda na zemlji i kidanje rodbinskih veza

Rekao je Uzvišeni Allah : “Zar i vi ne biste, kada bi se vlasti dočepali, nered na Zemlji činili i rodbinske veze kidali! To su oni koje je Allah prokleo i gluhim i slijepim ih učinio.” (Muhammed, 23.)

## Kršenje Allahovog ugovora

Rekao je Uzvišeni Allah : “A oni koji ne ispunjavaju dužnosti prema Allahu, iako su se na to čvrsto obavezali, i kidaju ono što je Allah naredio da se poštuje, i čine nered na Zemlji – njih čeka prokletstvo i najgore prebivalište.” (Er-Rad, 25.)

Kršenje Allahovog ugovora biva suprotstavljanjem Allahovoj naredbi i činjenjem nepokornosti.

## Lažljivac

Rekao je Uzvišeni Allah : “Ti reci: ‘Hodite, pozvat ćemo sinove naše i sinove vaše, i žene naše i žene vaše, a doći ćemo i mi, pa ćemo se usrdno pomoliti i Allahovo prokletstvo na one koji neistinu govore

(lažljivce) prizvati!” (Ali Imran, 61.)

## Dvoličnjaci

Rekao je Allah u prijevodu značenja: “Licemjerima i licemjerkama i nevjernicima Allah prijeti džehennemskom vatrom, vječno će u njoj boraviti, dosta će im ona biti! Allah ih je prokleo, i njih čeka patnja neprekidna.” (Et-Tevbe, 68.)


## Ubica

Ko ubije bespravno vjernika, zaslužuje Allahovo prokletstvo, s tim da ukoliko je musliman ubijen s pravom (tj. sprovođenjem šerijatske kazne), njegov ubica ne zaslužuje prokletstvo. Rekao je Allah Uzviseni: “Onome ko hotimično ubije vjernika kazna će biti – Džehennem, u kome će vječno ostati; Allah će na njega gnjev Svoj spustiti i proklet će ga i patnju mu veliku pripremiti.” (En-Nisa, 93.)

## Džehennemsko stablo - Zekcum

Rekao je: “I rekli smo ti: ‘Svi ljudi su u Allahovoj vlasti!’ A san koji smo ti dali da usniješ i drvo proketo, u Kur’anu spomenuto, iskušenje su za ljude. Mi ih zastrašujemo, ali njima to samo povećava ionako veliko nevjerstvo.” (Isra, 60.)

Islamski komentatori Kur’ana spomenuli su da je «drvo proketo» ustvari drvo Zekcum. A značenje sintagme “drvo proketo” odnosi se na: “prokletstvo onoga ko ga jede”, kao što je rekao Allah: “Drvo Zekcum – bit će hrana grješniku.” (Duhan, 43 - 44.)



## Potvora čestitih vjernica

Potvaranje čestitih i poštenih vjernica da su počinile zinaluk – blud. Rekao je Allah Uzviseni: “Oni koji obijede čestite, bezazlene vjernice, neka budu prokleti na ovom i na onom svijetu, njih čeka patnja nesnosna.” (Nur, 23.)

# OSOBE KOJE JE PROKLEO BOŽIJI POSLANIK



## Židovi i Kršćani

**R**ekao je Poslanik: «Allah je prokleo židove i kršćane, učinili su grobove svojih vjerovjesnika mesdžidima.» (Buhari i Muslim)

Rekao je Poslanik: “Allah je prokleo židove, zabranio im je loj pa su ga topili, a potom prodavali.” (Buhari i Muslim)

Hadis ukazuje na zabranu poigravanja sa Allahovim zabranama i pokušaj korištenja lukavstva ili trikova kako bi se ohalalila zabrana, na što ukazuje sljedeći hadis: “Allah je prokleo židove, Allah im je zabranio loj pa su ga topili, a potom su jeli njegovu vrijednost. A zaista, kada Allah zabrani nekom narodu neko jelo, zabrani mu i njegovu vrijednost.” (Hadis je sahih)

**Žene koje se tetoviraju i koje tetoviraju, i žene koje čupaju obrve i koje traže da im se čupaju obrve i koje stanjuju zube**

Ibn Mes`ud, radijellahu anhu, jedne je prilike rekao: “Allah je prokleo žene koje se tetoviraju i koje tetoviraju, i žene koje čupaju obrve i koje traže da im se čupaju obrve i koje stanjuju zube, uljepšavajući se i tako mijenjaju izgled koji Allah daje stvorenjima!” Kada mu je jedna žena prigovorila zbog toga, on joj je odgovorio: “A zašto da ne proklinjem onoga koga je prokleo Allahov Poslanik i čije je prokletstvo u Allahovoj Knjizi? Uzvišeni Allah kaže: Ono što vam Poslanik da – to prihvatite, a ono što vam zabrani – ostavite!” (Muttefekun alejhi)

## **Žene koje upliću tuđu kosu ili koje traže da im se to radi**

Rekao je Poslanik: “Allah je prokleo onu koja upliće tuđu kosu ili koja traži da joj se to radi.” (Buhari i Muslim) Allah je prokleo onu koja upliće tuđu kosu u svoju ili u kosu druge žene.

## **Uzimanje kamate**

Ibn Mes`ud, radijallahu anhu, prenosi: “Allahov Poslanik prokleo je onoga ko kamatu uzima i onoga ko je daje.” (Muslim) U Tirmizijinoj predaji stoji: “I svjedoke i onoga ko je zapisuje.” (Hadis je hasen sahih)

## **Postavljanje živog bića za metu**

Ibn Omer je jednom prilikom naišao pored mladića od Kurejšija koji su živu pticu postavili za metu, gađali je strijelama i davali vlasniku ptice svaku strijelu koja promaši. Kad su ugledali Ibn Omera, mladići se razbježaše, a on povika za njima: “Ko je ovo uradio? Allah prokleo onoga ko je ovo uradio, jer Allahov Poslanik, sallallahu alejhi we sellem, prokleo je onoga ko nešto živo postavi za metu!” (Muttefekun alejhi)

## **Muškarci koji oponašaju žene i žene koje oponašaju muškarce**

Allahov Poslanik prokleo je “ženstvene muškarce i muškobanjaste žene.” (Buhari) Allahov Poslanik prokleo je muškarce koji oponašaju žene i žene koje oponašaju muškarce. (Buhari)

## **Kradljivac**

Rekao je Poslanik, alejhi-selam: “Allah je prokleo kradljivca, ukrade jaje i odsiječe mu se ruka, ukrade konopac i odsiječe mu se ruka.” (Buhari i Muslim)

## **Onaj ko proklinje svoje roditelje**

Rekao je Poslanik, alejhi-selam: “Allah je prokleo onoga ko proklinje svoje roditelje.” (Muslim)

## **Prinošenje žrtve nekome drugom mimo allaha**

Rekao je Poslanik, alejhi-selam: “Allah je prokleo onoga ko prinese žrtvu nekome drugome mimo Allaha.” (Muslim)

## **Ko mijenja granice zemlje**

Rekao je Poslanik: “Allah je prokleo onoga ko promijeni granice zemlje.” (Muslim)

## **Ko pruži utočište onome ko čini nered na zemlji**

Rekao je Poslanik, alejhi-selam: “Allah je prokleo onoga ko pruži utočište onome ko čini nered na Zemlji.” (Muslim)

## **Žigosanje zivotinja na lice**

Ibn Abbas, radijallahu anhu, prenosi da je jedanput pored Allahovog Poslanika, sallallahu alejhi ve sellem, prošao magarac žigosane glave, pa je rekao: “Allah prokleo onoga ko ga je žigosao.” (Muslim)

## **Ko ohalali ili mu se ohalali žena**

Rekao je Poslanik, alejhi-selam: "Allah je prokleo onoga ko ohalali i onoga kome se ohalali žena." (Hadis je sahih)

Naime, poznato je da žena nije dozvoljena svome mužu nakon trećeg razvoda dok je ne oženi drugi muškarac u validnom braku, a Allah je prokleo onoga koji oženi razvedenu ženu, a potom je razvede sa ciljem da je ohalali njenom prvom mužu, a prokleo je i onoga kome se ohalali žena na taj način, i naravno takav brak nije validan i žena nije dozvoljena svome prvom mužu, šta više Poslanik, sallallahu alejhi ve sellem, je osobu koja pokušava ohalaliti ženu na prethodni način nazvao «iznajmljenim jarcem».

## **Naricanje za umrlim**

Kada se smrtno razbolio ashab Ebu Musa, njegova supruga je od žalosti počela vikati, a on ju je upitao: "A zar ne znaš šta je rekao Poslanik?" Odgovorila je: "Svakako." Potom je ušutjela. Nedugo nakon toga, neko ju je upitao: "Šta je rekao Poslanik?" Rekla je: "Zaista je Poslanik prokleo onu koja obrije (glavu zbog smrti bližnjeg), poviče (radi nedaće) i pocijepa (odjeću kad je zadesi nevolja)." (Hadis je sahih)

Prenosi Ebu Umame, radijallahu anhu, da je Poslanik prokleo onu koja grebe svoje lice, cijepa svoju odjeću i priziva nevolju i propast. (Hadis hasen)

## **Alkohol**

Rekao je Poslanik, alejhi-selam: "Allah je prokleo alkohol i onoga ko ga pije, toči, prodaje, onoga kome se prodaje, onoga ko ga pravi, ko ga nosi i kome se nosi." (Hadis je sahih)

Proklinjanje onoga ko to ne zaslužuje

U vrijeme Poslanika, sallallahu alejhi we sellem, vjetar je 'povukao' ogrtač čovjeka koji ga je prokleo. Potom mu je rekao Poslanik: "Ne čini to. Jer mu je (vjetru) tako naređeno. I zaista onaj koji prokune nešto / nekoga ko to ne zaslužuje, prokletstvo se vraća na njega." (Hadis je sahih)

## **Škorpija**

Prenosi Aiša da je Poslanik klanjao i da ga je ugrizla škorpija (akrep) i tada je rekao: "Allah prokleo škorpiju, ne ostavlja klanjača niti onoga koji ne klanja. Ubijte je u Haremu i van njega!" (Hadis je sahih) U drugoj predaji stoji: "...ne ostavlja vjerovjesnika niti bilo koga drugoga a da ih ne ugrize." (Hadis je sahih)

Allah je protjerao škorpiju i udaljio od milosti. A Poslanik, sallallahu alejhi ve sellem, je pojasnio razlog prokletstva: '...ne ostavlja klanjača...'

Poslanikov hadis o dozvoljenosti proklinjanja škorpije ukazuje na dozvoljenost proklinjanja životinja koje uznemiravaju, a proklinjanje životinja poimenično nije dozvoljeno, jer je Poslanik zaprijetio ženi koja je proklela svoju devu i rekao joj je: "Ne putuj zajedno sa nama, jer je ona prokleta."



## **Pljačkanje kabura**

Poslanik je prokleo onoga koji otkopava kabur (zbog pljačkanja). (Hadis je sahih)

## **Krivo upućivanje**

Rekao je Poslanik, alejhi-selam: “Allah je prokleo onoga koji pogrešno uputi slijepca i on skrene sa puta.” (Hadis je sahih)

## **Homoseksualizam**

Rekao je Poslanik, alejhi-selam: “Allah je prokleo onoga ko učini djelo Lutova naroda”, ponovivši to tri puta. (Hadis je sahih)

## **Sodomija**

Rekao je Poslanik, alejhi-selam: “Allah je prokleo onoga ko napastvuje hajvana (spolni akt, sodomija).” (Hadis je sahih)

## **Rob koji se pripisuje nekom mimo onog ko ga je oslobodio**

Rekao je Poslanik, alejhi-selam: “Allah je prokleo onog roba koji se pripíše nekome drugome mimo onoga koji ga je oslobodio.” (Muslim) S oslobađanjem se stiče veza (vela), kojom se oslobodilac roba tretira kao srodnik oslobođenom robu, gdje nasljeđuje oslobođenog roba, ukoliko rob ne imadne šerijatskog nasljednika. Ovaj postupak je zabranjen jer se njime negiraju blagodati (oslobađanje) i gubljenje prava kao što je nasljeđivanje.

## **Neposlušnost roditeljima**

Rekao je Poslanik, alejhi-selam: “Allah je prokleo onoga ko je neposlušan svojim roditeljima.” (Hadis je sahih)

## **Uperivanje oružija u drugoga**

Rekao je Poslanik, alejhi-selam: “Zaista meleki proklinju onoga ko uperi oštricu prema svome bratu, čak da mu je brat od oca i majke.” (Muslim)



## **Lažno pripisivanje nekome mimo vlastitog oca**

Poslanik, sallallahu alejhi ve sellem, je prokleo onoga koji se pripisuje nekome drugome mimo svoga rođenog oca. (Muslim)

## **Općenje sa suprugom u analni otvor**

Rekao je Poslanik, alejhi-selam: “Proklet je onaj koji opći sa svojom ženom u njen analni otvor.” (Hadis je hasen)

## **Dunjaluk**

Rekao je Poslanik, alejhi-selam: “Zaista je dunjaluk proklet i proketo je sve ono što je na njemu osim Allahovog zikra, onoga što On voli, učenjaka ili onoga koji se podučava.” (Hadis je sahih)

Dunjaluk je mrzak Allahu zbog toga što je udaljen od Njega i proketo je sve ono što čovjeka zaokuplja i udaljava od Allaha, osim spominjanja Allaha i onoga što On voli od dobrih djela.

Dunjaluk je ukoren i ne hvali se ništa što je na njemu, osim zikrullaha, učenjaka i onoga koji se podučava.


Dunjaluk je proklet zato što zavodi ljude svojom ljepotom i naslađivanjem i udaljava ih od robovanja Allahu, a navodi “robovanju” strastima. I dunjaluk i sve što je na njemu udaljeni su od Allaha, osim korisnog znanja koje ukazuje na Allaha. I prokletstvo je

vezano za dunjalučke obmane, a ne za blagodati i naslađivanje, jer su blagodati i naslađivanje bili dati i poslanicima.

## **Vršenje nužde na stazi kojom prolaze ljudi**

Rekao je Poslanik, alejhi-selam: “Čuvajte se dviju stvari koje su proklete.” Ashabi su upitali: “A ko je su to stvari?” Rekao je: “Vršenje nužde na putu kojim ljudi prolaze i u hladovima (gdje se ljudi odmaraju).” (Muslim)

Hadis ukazuje da se moramo čuvati ove dvije stvari čije prakticiranje izaziva prokletstvo i čiji su izvršitelji prokleti, a također navedeni postupci su zabranjeni jer uznemiravaju muslimane.



# Počasti žene u islam



**A**llahovom milošću, islam je ženi dao visoko i odveć časno i plemenito mjesto. Činjenica da je žena ta koja odgaja islamski ummet, ukazuje na to. Neko je kazao da su žene polovina Muhammedovog ummeta, a da su drugu polovicu one rodile, pa im pripada cjelokupna zasluga. Da je islam ženi dao posebnu počast govori i to da je Allah naslovio jednu Kur'ansku suru po njoj, a to je sura "En-Nisa" (Žene). S druge strane, ne postoji sura po imenu "muškarci". Zatim, Uzvišeni Allah u Kur'anu i Njegov Poslanik Muhammed, sallahu alejhi ve selem, u hadisu često ukazuju na vrijednost žene kao majke, supruge ili kćerke.

Od stvari kojima je žena počašćena u islamu su:

1. Potpuna ravnopravnost sa muškarcem u pogledu propisa vjere. Naredbe i zabrane se jednako tiču muškarca i žene u islamu.
2. Allah u Kur'anu kaže da nas je stvorio od jednog muškarca i jedne žene. Dakle, žena je neizostavan faktor u procesu produženja ljudske vrste. Kaže Uzvišeni Allah: "O ljudi, zaista smo vas Mi stvorili od muškarca i žene". (El-Hudžurat, 13.)
3. Muhammed, alejhi selam, je odredio poseban dan za podučavanje žena. Prenosi se od Ebu Seida, radijallahu anhu, da je kazao: Obratile su se žene Poslaniku, sallallahu alejhi ve sellem i rekle: "Muškarci su nas pretekli u druženju s tobom, pa daj nam jedan dan od sebe." "Pa im je obećao jedan dan i sastajao se s njima, te im je u njemu vazio i naređivao (propise)." (Buhari i Muslim)

4. Islam je dao prednost ženi kao majci u odnosu na muškarca kao oca. Došao je čovjek Muhammedu, alejhi selam, i upitao: "O Allahov poslaniče, ko od ljudi ima najveće pravo kod mene?" Reče: "Tvoja majka". "Zatim ko?" upita. Reče: "Tvoja majka". "Zatim ko?" upita. Reče: "Tvoja majka". "Zatim ko?" upita. Reče: "Tvoj otac". (Buhari i Muslim)


Dakle, Muhammed, alejhi selam, dao je prednost tri puta majci u odnosu na oca!

5. Allahov Poslanik, alejhi selam, je podsticao muškarce da budu dobri prema svojim ženama kada je kazao: "Najbolji od vas je onaj koji je najbolji prema svojoj supruzi, a ja sam najbolji prema svojim suprugama" (Hadis je sahih)

6. U Kur'anu-Kerimu postoji sura koja nosi ime jedne žene. To je sura "Merjem", koja je dobila ime po Merjemi, majci Isaa, alejhi selam. Allah nije niti jednu suru nazvao po imenu muškaraca, osim imena Njegovih poslanika.

7. Muhammed, alejhi selam, je na najvećem skupu na kome je govorio oporučio vjernicima prava žena, te je kazao: "Bojte se Allaha u pogledu žena, zaista ste ih uzeli kao emanet od Allaha". (Hadis je hasen)

Još je mnogo primjera počasti žene u islamu, međutim, nemoguće ih je sve spomenuti u jednom tekstu. To je samo još jedna stvar koja ukazuje na činjenicu da je mjesto žene kao majke, supruge, kćerke i sl. u islamu posebno i neizostavno. Sestro muslimanko, budi sretna što te Allah počastio da budeš muslimanka.



# VRIJEDNOST UČENJA KUR'ANA

**U**čenje Kur'ana je poseban ibadet i zikir kojim se kod Uzvišenog Allaha postiže obilna nagrada. Stoga je dosta ajeta i hadisa koji podstiču vjernika na učenje i izučavanje Kur'ana. Prenosi se od Osmana, radijallahu anhu, da je Poslanik, sallallahu alejhi ve sellem, rekao: "Najbolji od vas su oni koji nauče Kur'an i njemu druge poučavaju." (Buhari) Prenosi se od Ebu Musaa el-Eš'arija da je Vjerovjesnik, sallallahu alejhi ve sellem, rekao: "Vjernik koji uči Kur'an je poput dunje, lijepog je i okusa i mirisa. A onaj koji ne uči Kur'an, on je poput datule, lijepog je okusa, ali je bez mirisa. Primjer grješnika koji uči Kur'an je kao primjer mirisnog bosiljka, lijepog mirisa, a gorkog okusa. Onaj grješnik koji ne uči Kur'an je poput gorkog kaktusa, gorkog je okusa, a bez mirisa." (Buhari i Muslim) Prenosi se od Enesa ibn Malika,

radijallahu anhu, da je Allahov Poslanik, sallallahu alejhi ve sellem, rekao: "Vjernik koji uči Kur'an i postupa po njemu je poput dunje, lijepog je i mirisa i okusa. A vjernik koji ne uči Kur'an, ali radi po njemu, poput je datule, lijepog je okusa, ali nema nikakvog mirisa. Munafik (licemjer) koji uči Kur'an je kao mirisna rejhana (bosiljak), daje lijep miris, a gorkog je okusa. A munafik koji ne uči Kur'an je poput kaktusa, gorkog je okusa, a ružnog i gadnog mirisa." (Buhari) Prenosi se od Ebu Zerra, radijallahu anhu, da je rekao: "Allahov Poslaniče, oporuči mi nešto", a Poslanik mu reče: "Oporučujem ti bogobožnost, jer je ona najbitnija stvar." "Allahov Poslaniče, dodaj još?", reče on. Poslanik mu reče: "Uči Kur'an, jer on je tvoja svjetlost na Zemlji i tvoja opskrba na nebesima." (Hadis sahihu li gajrihi) Od Burejde, radijallahu anhu, prenosi se

da je Allahov Poslanik, sallallahu alejhi ve sellem, rekao: "Uzvišeni Allah će roditeljima onoga koji bude učio Kur'an, izučavao ga i radio po njemu, na Sudnjem danu staviti krunu od svjetla (nura), koja će obasjavati kao što Sunce obasjava, i odjenut će ih i sa dva ogrtača kojih ni dunjaluk nije vrijedan. Roditelji će upitati: 'Zbog čega nam je ovo odjeveno?' Bit će im rečeno: 'Zbog vašeg djeteta koje je Kur'an prihvatilo.'" (Hadis je sahihu li gajrihi).

Prenosi se od Ebu Hurejre, radijallahu anhu, da je rekao: "Ko prouči deset ajeta u jednoj noći, neće se računati u one koji su nemarni." (Hadis je sahihu li gajrihi) Prenosi Abdullah ibn Mes'ud, radijallahu anhu, da je Poslanik, sallallahu alejhi ve sellem, rekao: "Ko prouči jedan harf (slovo) iz Allahove Knjige (Kur'ana), za to će imati jedno dobro djelo, a dobro djelo se nagrađuje deseterostruko. Ne kažem da je 'elif lam mim' harf (slovo), nego je elif harf, lam je harf i mim je harf." (Hadis je sahih)

### **Vrijednost učenja sure "El-Fatiha"**

Prenosi se od Ebu Seida ibn El-Mu'alle, radijallahu anhu, da je rekao: "Jedne prilike sam klanjao u mesdžidu pa me Poslanik, sallallahu alejhi ve sellem, pozva, a ja mu se ne odazvah. Kada sam završio sa namazom, prišao sam mu i rekao: 'Allahov Poslaniče, klanjao sam', a on na to reče: 'Zar Uzvišeni Allah nije rekao: 'Odazovite se Allahu i Njegovu Poslaniku kada vas pozovu...' Zatim je rekao: "Prije nego što izađeš iz mesdžida poučit ću te suri koja je najveličanstvenija sura u Kur'anu. "Uzeo me je za ruku i prije nego smo izašli iz mesdžida, ja mu rekoh: 'Allahov Poslaniče, rekao si da

ćeš me poučiti najveličanstvenijoj suri iz Kur'ana?' Poslanik reče: 'El-hamdu lillahi rabil-'alemin (Sura El-Fatiha), to je sedam ajeta koji se ponavljaju i Kur'an veličanstveni koji mi je dat.'" (Buhari) Od Ebu Hurejre, radijallahu anhu, prenosi se da je rekao: "Čuo sam Allahova Poslanika, sallallahu alejhi ve sellem, da kaže: 'Uzvišeni Allah je rekao: Podijelio sam namaz (Fatihu) između Mene i Moga roba na dva dijela. Mome robu pripada ono što je tražio. Kada Moj rob kaže: El-hamdu lillahi rabbil-'alemin, Allah kaže: Moj rob Me hvali. A kada kaže: Er-Rahmani-r-Rahim, Allah kaže: Moj rob Me veliča. Kada kaže: Maliki jevmi-d-din, Allah kaže: Moj rob Me slavi. Kada kaže: Ijjake na'budu ve ijyake neste'in, Allah kaže: Ovo je između Mene i Moga roba, a njemu pripada ono što je tražio. I kada kaže: Ihdine-s-sirata-l-mustekim, sirata-l-lezine en'amte 'alejhim gajri-l-magdubi 'alejhim ve le-d-dalin, Allah kaže: Ovo pripada Mome robu, i on će dobiti ono što je tražio.'" (Muslim)

Ibn Abbas, radijallahu anhu, prenosi od Allahova Poslanika, sallallahu alejhi ve sellem: "Dok je jedne prilike kod Poslanika, sallallahu alejhi ve sellem, sjedio Džibril, iznad je čuo škripu, pa je podigao glavu i rekao: 'Ovo su se otvorila jedna nebeska vrata koja se do danas nikad nisu otvarala.' Na njih uđe melek, a on reče: 'Ovo je melek koji se spustio na Zemlju, a do danas nikad nije silazio na nju.' Taj melek nazva selam i reče: 'Budi radostan što su ti data dva nura (svjetlosti) koja nisu data nijednom vjerovjesniku prije tebe. To su El-Fatiha i završetak sure El-Bekare. Nećeš proučiti nijedan harf iz njih, a da ti neće biti dato ono što tražiš.'" (Muslim)

## Vrijednost sura El-Bekare i Ali Imran

Od Ebu Hurejre, radijallahu anhu, prenosi se da je Allahov Poslanik, sallallahu alejhi ve sellem, rekao: "Ne pravite od svojih kuća kaburove. Šejtan bježi iz kuće u kojoj se uči sura El-Bekare." (Muslim). Od Ebu Umame el-Bahilija, radijallahu anhu, prenosi se da je rekao: "Čuo sam Allahova Poslanika, sallallahu alejhi ve sellem, da kaže: 'Učite Kur'an, jer će on na Sudnjem danu doći kao zagovornik onima koji ga budu učili. Učite Zahravejn (El-Bekare i Ali Imran), jer će one na Sudnjem danu doći kao dva oblaka ili kao dvije ptice koje štite svoga učača. Učite suru El-Bekare, jer je njeno učenje bereket (blagoslov), a njeno zapostavljanje gubitak. Protiv nje sihirbazi ništa ne mogu.'" (Muslim) Prenosi se od Sehla ibn Sa'da, radijallahu anhu, da je Poslanik, sallallahu alejhi ve sellem, rekao: "Sve ima svoj vrhunac, a vrhunac Kur'ana je sura El-Bekare. Ko je prouči u svojoj kući noću, šejtan u tu kuću neće ulaziti tri noći, a ko je prouči danju, šejtan u nju neće ulaziti tri dana." (Hadis je sahihu li gajrihi)

## Vrijednost Ajetul-Kursije

Od Ubejja ibn Ka'ba, radijallahu anhu, prenosi se da mu je otac kazivao da su imali jedan vrt u kojem su uzgajali datule. Otac je taj vrt redovno obilazio, pa je primijetio da datule nestaju. Te noći je ostao da ih čuva, kad se pojavi životinja u liku odraslog mladića. Otac mu nazva selam, a ovaj mu odvrati. On ga upita: "Šta si ti, džinn ili čovjek?" "Džin", odgovori mu. "Daj da ti vidim ruku?", rekoh mu. Kad ono pseća šapa i pseće dlake. Rekao sam sebi: "Ovo je džinsko stvorenje." Džin reče: "Džini znaju da među njima

ima onih koji su jači od mene." "Šta te je navelo da uradiš to što si uradio", upitah ga. "Čuo sam da voliš dijeliti sadaku, pa sam poželio da i ja nešto dobijem od tvoje hrane", odgovori on. Ja ga upitah: "Šta nas može zaštititi od vas", a on odgovori: "Ajetul-kursijj." Nakon toga – priča prenosilac – ja sam otišao, a otac je sutradan otišao kod Poslanika i o tome ga obavijestio. Na to mu je Poslanik, rekao: "Istinu ti je rekao pokvarenjak." (Hadis je sahih)

Prenosi se također od Ubejja ibn Ka'ba, radijallahu anhu, da je Allahov Poslanik, sallallahu alejhi ve sellem, rekao: "Ebul-Munzire (oče Munzirov), znaš koji je ajet iz Allahove Knjige najveći (najveličanstveniji)?" "Allah i Njegov Poslanik najbolje znaju", rekao sam, a Poslanik ponovi: "Ebul-Munzire, znaš li ti koji je ajet iz Allahove Knjige najveličanstveniji?" Ja rekoh: "Allahu la ilahe illa huvel-hajjul-kajjum...(Ajetul-kursijj)." On me potapša po prsima i reče: "Neka ti je na čast tvoje znanje, Ebul-Munzire" (Muslim)

## Vrijednost zadnjih ajeta sure Ali Imran

Prenosi se od Ata'a i Ibn Umejra da su došli kod Aiše, radijallahu anha, i da joj je Ibn Umejr rekao: "Kaži nam šta ti je najčudnije što si vidjela kod Allahova Poslanika?" Malo je šutjela, a zatim rekla: "Jedne noći Poslanik mi je rekao: 'Aiša, ostavi me samog da ovu noć svome Gospodaru ibadet činim.' Ja sam mu rekla: 'Tako mi Allaha, ja volim da sam u tvojoj blizini i volim činiti ono što te raduje.' Zatim je ustao, uzeo abdest i počeo klanjati. U namazu je plakao sve dok (suzama) nije natopio svoje krilo.' Dalje

kaže: ‘Bio je u sjedećem položaju i plakao je sve dok nije natopio svoju bradu i dalje je nastavio da plače sve dok nije natopio i zemlju (oko sebe). U tom je došao Bilal da prouči ezan za sabah-namaz, i kada ga je vidio da plače, upitao je: ‘Allahov Poslaniče, plačeš, a Allah ti je oprostio i prošle i buduće grijeh?’ Poslanik mu na to reče: ‘A zar da ne budem zahvalni rob? Večeras mi je objavljen ajet: U stvaranju nebesa i Zemlje i u smjeni noći i dana su, zaista, znamenja za razumom obdarene, za one koji i stojeći i sjedeći i ležeći Allaha spominju i o stvaranju nebesa i Zemlje razmišljaju. ‘Gospodaru naš, Ti nisi ovo uzalud stvorio; hvaljen Ti budi i sačuvaj nas patnje u vatri!’ (Ali Imran, 190 i 191) Teško onome ko ga pročita a o njemu ne razmišlja.’ (Hadis je hasen)

### **Vrijednost pamćenja prvih deset ajeta sure El-Kehf**

Prenosi Ebu Derda’, radijallahu anhu, da je Poslanik, sallallahu alejhi ve sellem, rekao: “Ko nauči napamet prvih deset ajeta sure El-Kehf bit će zaštićen od Dedždžala.” (Muslim)

### **Vrijednost učenja sura Ihlas, Felek i Nas**

Prenosi Ebu Derda’, radijallahu anhu, da je Poslanik, sallallahu alejhi ve sellem, rekao: “Jeli iko od vas u mogućnosti da u jednoj noći prouči trećinu Kur’ana?” Upitali su: “A kako će proučiti trećinu Kur’ana?” Poslanik odgovori: “‘Kul-huvallahu ehad’ vrijedi trećinu Kur’ana.” U Muslimovom rivajetu stoji: “Uzvišeni Allah podijelio je Kur’an na tri dijela. Kul-huvallahu ehad je učinio jednim od tih dijelova.”Prenosi se od Aiše,

radijallahu anha, da je Vjerovjesnik, sallallahu alejhi ve sellem, poslao jednog od ashaba na čelu vojne izvidnice. Taj čovjek je klanjao kao imam svojim prijateljima i svaki put namaz završavao sa Kul-huvallahu ehad. Kada su se vratili, to su spomenuli Poslaniku, sallallahu alejhi ve sellem, a Poslanik im je rekao: “Upitajte ga što je to činio?” Oni su ga i upitali, a ovaj im je rekao: “Zbog toga što je ta sura Allahovo svojstvo i ja volim da je učim.” Na to je Poslanik, sallallahu alejhi ve sellem rekao: “Kažite mu da i njega Allah voli.” (Buhari)

Od Seida el-Hudrija prenosi se da je jedan čovjek čuo drugog čovjeka kako uči i ponavlja Kul-huvallahu ehad. Kada je osvanuo sljedeći dan, on je otišao do Poslanika, sallallahu alejhi ve sellem, i to mu spomenuo— kao da je htio kazati da je to što uči malo – a Allahov Poslanik, sallallahu alejhi ve sellem, reče: “Tako mi Onoga u čijoj je ruci moja duša, ona vrijedi trećinu Kur’ana.” (Buhari)

Ukbe ibn Amir prenosi da je Allahov Poslanik, sallallahu alejhi ve sellem, rekao: “Zar nisi čuo ajete koji su mi objavljeni ove noći. Slične im do sada niko čuo nije. Kul-e>uzu bi rabbil-felek i Kul-e>uzu bi rabbi-n-nas.” (Muslim)



# PUT DO DOBROG DIJETETA

**D**obro dijete je najbolje bogatstvo koje musliman ostavlja iza sebe, ono koristi njegovim roditeljima u životu, a i poslije smrti. Zbog toga je Allahov Poslanik, sallallahu alejhi ve sellem, rekao: “Kada umre rob, prekinu se sva njegova djela, osim troje: trajna sadaka, znanje koje koristi i dobro dijete koje dovi za njega.” (Hadis je sahih) U prethodnom hadisu je spomenuto dobro dijete, pa koja su to sredstva za dobijanje dobrog djeteta?

## Odabir majke

Obaveza muslimana je da svojoj djeci odabere majku muslimanku, koja poznaje pravo svoga Gospodara, svoga muža, svoga djeteta, koja poznaje kako da se nosi sa poteškoćama prilikom dječijeg odgoja. Ona poznaje svoj životni zadatak i svoje mjesto u iskušenjima. Ljubomorna je na svoju vjeru i sunnet Poslanika, sallallahu alejhi ve sellem. Ona je ta koja treba da rodi djecu i ona je škola iz koje će tvoja djeca izaći. Ukoliko je ona dobra, “zadojit” će ih dobrotom i bogobojažnošću, jer u ženi muslimanki se nalaze odgojna sredstva, koja se ne nalaze u drugim ženama. Zar nisu Aliju, radijallahu anhu, četvrtog muslimanskog

halifu, odgojile dvije posebne žene: njegova majka Fatima bint Esed i Hatidža, radijallahu anha, majka pravovjernih. Omera ibn Abdulaziza, Allah mu se smilovao, jednog od najbogobojaznijih i najpravednijih vladara je odgojila njegova majka Ummu-Asim, koja je bila najboljeg odgoja i najbolje je poznavala propis halala u svome vremenu. Od onih koje je zabilježila istorija je Abdurrahman En-Nasir, rahimehullah, koji je u periodu svoje vladavine u Endelusu dospio u srce Francuske i stigao do Švicarske, a tajna njegovog uspjeha leži u njegovom odgoju, za koji se postarala samo njegova majka, jer je odrastao kao jetim - bez oca. Velikan ovog ummeta Sufjan Es-Sevri, Allah bio s njim zadovoljan, fekih i muhadis, je odrastao kao siročće, a za njegovo obrazovanje se pobrinula njegova majka, koja ga je ostavljala da se posveti znanju, dok se ona starala za opskrbu i ishranu, prodavajući predenu vunu. Ne bi pogriješili kada bi rekli da iza svakog velikana stoji žena.

## Dova

Na muslimanu je obaveza da moli Uzvišenog Allaha da ga opskrbi sa dobrim djetetom, koje će mu koristiti u životu,



a i poslije smrti: “A kada te robovi Moji za Mene upitaju, Ja sam sigurno blizu: odazivam se molbi molitelja kada Me zamoli!” (Al-Bakara, 186), “I oni koji govore; Gospodaru naš, podari nam u ženama našim i djeci našoj radost i učini da se čestiti na nas ugledaju!” (Al-Furkan, 74.)

### **Dova prilikom ženidbe**

Dova prilikom ulaska kod mlade je sunnet Poslanika, sallallahu alejhi ve sellem, koji je pao u zaborav zbog naše nehajnosti i nemarnosti prema prakticiranju sunneta. Prenosi se od Abdullaha ibn Amra ibn El-Asa, radijallahu anhumu, da je Poslanik, sallallahu alejhi ve sellem, rekao: “Kada se neko od vas oženi ili kupi slugu neka kaže: ‘Allahu moj, molim Te da mi u njoj podariš dobro i da ono čemu je ona po naravi sklona bude dobro. I utječem Ti se od njenog zla i zla onoga čemu je po prirodi sklona.’” (Hadis je hasen)

### **Dova prije spolnog odnosa**

Prenosi se od Ibn Abbasa, radijallahu anhumu, da je Poslanik, sallallahu alejhi ve sellem, rekao: “Kada bi neko od vas kada priđe svojoj ženi rekao: ‘Bismillah, Allahu moj, udalji nas od šejtana i udalji šejtana od onoga čime si nas opskrbio’, pa im se začne dijete, nikada mu šejtan ne bi mogao nauditi.” (Buhari)

### **Odabir lijepog imena**

Na muslimanu je da odabere za svoje dijete najbolje i najljepše ime, jer je to ono na što nas je podsticao Poslanik, sallallahu alejhi ve sellem, obaviještavajući nas o najdražim imenima Allahu: “Allahu su najdraža imena: Abdullah i Abdurrahman.” (Muslim)

El Kurtubi, rahmetullahi alejhi, je rekao: Ovim imenima se pridružuju sva imena slična njima, kao što je: Abdul-Kerim,

Abdul-Melik, Abdus-Samed i ostala. Ovo su najdraža imena Allahu, subhanehu ve te’ala, jer u sebi sadrže opis koji je obavezan Allahu, azze ve dželle. Također je u njima opis koji je obavezan insanu, a to je ropstvo Njemu.

Poslanik, sallallahu alejhi ve sellem, je rekao: “Nazivajte svoju djecu po poslanicima, a Allahu su najdraža imena Abdullah i Abdurrahman, najistinitija imena su Haris i Hemmam.” (Hadis je sahih) Hafiz Ibn Hadžer, Allah mu se smilovao, je rekao: Haris (koji sije) je osoba u sijanju i žetvi, dunjalučkoj ili ahiretskoj, a Hemmam (onaj koji je ambiciozan) je čovjek koji se neprestano brine za nešto.

### **Akika za dijete**

Prenosi Ummu-Kurz El-Ka’bije, radijallahu anha, da je čula Poslanika, sallallahu alejhi ve sellem, da je rekao: “Za dječaka dvije ovce, a za djevojčicu jedna!” (Hadis je sahih)

To je pravo djeteta kod njegova oca, to je zahvala Allahu, subhanehu ve te’ala, na blagodati prema roditeljima u rađanju djeteta, to je pokornost Allahu, azze ve dželle, sadaka siromasima i iskup novorođenčetu. Čini se sedmi dan od rođenja djeteta, a ukoliko se ne bude u mogućnosti u to vrijeme, dozvoljeno je i poslije. Mustehab je kod većine učenjaka, bez obzira da li novorođenče bilo muško ili žensko.

### **Brijanje glave**

Pohvalno je da se sedmi dan nakon rođenja novorođenčetu obrije glava i udjeli u srebru u težini obrijanje kose. Rekao je Alija ibn Ebi Talib, radijallahu anhu, da je Poslanik zaklao akiku za Hasana sa jednom ovcom i da je rekao: “O Fatima! Obrij njegovu glavu i udijeli sadaku u srebru u težini obrijane kose!” (Hadis je sahih)



# SIHR I SIHIRBAZI

**Z**naj, dragi brate i cijenjena sestro u islamu, da je Uzvišeni Allah stvorio ljude i džine samo iz jednog plemenitog cilja, a to je da budu Njegovi robovi, tj. da Mu se pokoravaju u Njegovim naredbama i da se klone Njegovih zabrana. Zato je Uzvišeni Allah, dželle še'nuh, slao poslanike i spuštao knjige kako bi ljudima detaljno pojasnio put koji vodi ka Njegovom oprostumu i vječnom uživanju u džennetu i puteve koji vode ka Njegovoj srdžbi i propasti na dunjaluku i ahiretu.

Od puteva koji izazivaju Allahovu srdžbu i prizivaju propast je dolazak u bilo kakav kontakt sa sihrom i sihirbazima. Uzvišeni Allah, dželle še'nuh, najstrožije je zabranio bavljenje sihrom i traženje ikakve pomoći od sihrbaza, koji su Njegovi jasni i otvoreni neprijatelji, zato što je šteta prouzrokovana tim odvratnim djelom neprocjenjiva.

Sihr je svaki tajni i nepoznati vid liječenja ili izazivanja bolesti putem izučavanja, čaranja, zapisa, trava i sl. što koristi sihirbaz kako bi na tajnovit način pomogao ili naučio određenoj osobi. Također, u sihr ulazi i svaki

vid magije koja izokreće stvarnost u očima ljudi.

Sihirbaz je onaj koji se bavi sihrom i pravi ga putem saradnje sa šejtanima i pokvarenim džinima, koji mu se pokoravaju i pomažu, ali za uzvrat od njega traže da čini neka odvratna i Allahu mrska djela; kao činjenje sedžde šejtanima, ili bacanje Mushafa u izmet, ili psovanje Allaha, azze ve dželle, i sl.

Neki od znakova pomoću kojih se mogu prepoznati sihirbazi su:

- 1.) Pisanje talismana, hamajlija, zapisa i sl.,
- 2.) Sihirbaz pita bolesnika o njegovom imenu, imenu njegovog oca ili majke i sl.,
- 3.) Sihirbaz daje bolesniku određene stvari da ih zakopa, odnese na određeno mjesto i sl.,
- 4.) Izgovara nerazgovjetne riječi, brzo i nejasno govori, govori nepoznatim jezikom i sl.,
- 5.) Daje bolesniku određene listove, talismane, preparate i sl. da ih spali i kadi se njihovim dimom,
- 6.) Daje bolesniku krv da se njome maže i sl.,
- 7.) Neurednost, nečistoća, odvratni miris,

izopačenost u licu, tama u očima itd.

Pravljenje, izučavanje, podučavanje i svaki drugi vid bavljenja sihrom je najstrožije zabranjen u islamu i u svim prethodnim nebeskim objavama, koje su derogirane, a na to upućuje i zdrav razum, kojim je Allah, azze ve dželle, nadario čovjeka.

Uzvišeni, dželle šeṅnuh, rekao je pojašnjavajući opasnost sihira: "Učili su ono što će im nauditi i od čega nikakve koristi neće imati iako su znali da onaj koji tom vještinom vlada neće nikakve sreće na onom svijetu imati. A doista je jadro ono za što su se prodali, kada bi samo znali!"

(El-Bekare, 102)

Sihir i sihribaz su osuđeni na totalnu propast, na dunjaluku i ahiretu, i neće uspjeti gdje god bili, kao što Allah, dželle šeṅnuh, kaže: "Doista, ono što su oni napravili, je samo varka sihribaza, a sihribaz neće, ma gdje došao, uspjeti." (Ta-Ha, 69)

Svaki vid bavljenja sihrom, bilo da ga čini, ili podučava druge, ili da je zadovoljan njime, je jasno nevjerstvo u Uzvišenog Allaha, dželle dželaluh, i očito otpadništvo od vjere islama, kao što se da zaključiti iz prethodno spomenutih ajeta.

Isti propis važi i za sve vrste gatara, vračara, proricatelja sudbine i njima sličnih, koji putem džina, šejtana, zvjezda i određenih prirodnih pojava obavještavaju o budućnosti, sudbini, izgubljenim stvarima i sl.

Onaj koji odlazi kod sihribaza, vračara, gatara i obraća im se za pomoć počinio je veliki grijeh prema Uzvišenom Allahu i od takvog se namaz ne prima četrdeset dana i noći sa obavezom da iste klanja, kao što je vjerodostojno preneseno u hadisu. Ista kazna sljeduje i one koji čitaju horoskope i prate TV-emisije koje se bave proricanjem sudbine.

Prethodno spomenuti propis je, naravno, za onog koji ne povjeruje u ono što kazuju ovi pokvarenjaci. Ako se desi da im povjeruje i potvrdi ono što oni proriču takav je počinio još veći grijeh i uznevjerovao u sve što je objavljeno Allahovom Poslaniku, Muhammedu, sallallahu alejhi ve sellem.

Ebu Hurejre, radijallahu anhu, prenosi od Allahovog Poslanika, sallallahu alejhi ve sellem, da je rekao: "Ko ode proricatelju ili gataru i povjeruje u ono što mu kaže, taj je uznevjerovao u ono što je objavljeno Muhammedu, sallallahu alejhi ve sellem."

(Hadis je sahih)

Obaveza je lijek tražiti u propisanim i dozvoljenim stvarima, a ne u onome čija je šteta, bez imalo sumnje, mnogo veća nego prividna korist.

Onome, koji bude iskušán nekom od duševnih ili fizičkih bolesti, propisano je da se liječi na sljedeći način

1. Da čvrsto vjeruje da su svaka bolest i lijek od Uzvišenog Allaha, azze ve dželle,
2. Da moli Allaha, dželle šeṅnuh, za ozdravljenje,
3. Da se liječi Kur'anom i ispravnim vjerodostojnim dovama,
4. Da traži lijeka u nekim od dozvoljenih uzroka; kao odlazak pouzdanom doktoru, korištenje provjerenih medikamenata i sl.

Allah, azze ve dželle, rekao je: "Mi objavljujemo u Kur'anu ono što je lijek i milost vjernicima, a nevjernicima on samo povećava propast." (El-Isra, 82)



# PČELA KAO PRIMJER VJERNICIMA



**I**mam Bejheki, Allah mu se smilovao, bilježi hadis u svojoj knjizi Šu`abul - Iman kojeg prenosi od Abdullaha ibn Amra, radijallahu - ahnu, da je Poslanik, sallallahu alejhi ve sellem, rekao: "Primjer vjernika je kao primjer pčele! Jede ono što je čisto (dobro, halal), proizvodi ono što je čisto, i stane (na grančicu) pa niti je slomi niti je uništi." (Hadis je hasen)

### Koje su to posebnosti pčele?

Poslanik, sallallahu alejhi ve sellem, uporedio je u navedenom hadisu vjernika sa pčelom. Iz hadisa zaključujemo da ovo poređenje nije djelimično, nego potpuno. Kada kažemo da je ova usporedba vjernika sa pčelom potpuna, time želimo kazati da vjernik liči na pčelu onoliko koliko je pčela korisna sebi i drugima, tj. ima sve dobre osobine koje pčela posjeduje. Zato Poslanik, sallallahu alejhi ve sellem, u

ovom hadisu spominje samo ona svojstva koja su dostojna i u datom trenutku najvrijednija spominjanja u kontekstu jednog dobrog vjernika, ostavljajući onima koji ga slušaju da razmisle i o mnogim drugim kvalitetima ove male, ali jako sofisticirane životinje. Mi ćemo u ovom tekstu pokušati podrobnije objasniti riječi plemenitog Poslanika, sallallahu alejhi ve sellem, u navedenom hadisu. Dakle, kaže Poslanik sallallahu alejhi ve sellem: „Jede ono što je čisto (dobro, halal), proizvodi ono što je čisto, i stane (na grančicu) pa niti je slomi niti je uništi.“ Sve navedene osobine pčele u hadisu izdvajaju je od svih drugih insekata. Dakle, samo ona, u odnosu na sve druge insekte, ima ove lijepe osobine. Pčela je jedina koja prenosi polen sa cvijeta na cvijet i tako ih međusobno oploduje. Također, ona se spušta samo na čiste i mirisne cvjetove, zaobilazeći one

druge neugodnih mirisa. S druge strane, skakavci, ose, komarci i drugi insekti su prenosnici zaraza, otrova, nečistoća, pa čak i faktori koji svojim nepravilnim prenošenjem polena blokiraju međusobno oprašivanje biljaka, a samim tim mnogobrojne voćke čine neplodnim... Allah, azze ve dželle, nadahnuo je pčelu, kao što smo spomenuli, da odabire najbolje i najčišće cvjetove koji su osnovna sirovina za med. Stoga, med koji se može naći u šumama, planinama, u šupljinama drveta ili drugim mjestima na kojima su pčele napravile svoja staništa, mnogo je zdraviji, kvalitetniji i ukusniji od meda kojeg su napravile pčele iz košnice, koje su jele ono što su im ljudi nametnuli. Međutim, bez obzira na to odakle se hrani, med, koji se proizvodi u želudcu pčele je najbolja i najčišća izlučevina od svih drugih životinjskih izlučevina i ona je korisna u potpunosti. Upravo zbog toga Kur'ani Kerim hvali i blagosilja ovu malu životinju. Pčela je takva vrsta insekta da ni na koji način ne oštećuje ili uništava biljku, kao što nas o tome obavještava plemeniti Poslanik, sallallahu alejhi ve sellem. Dok osa ili skakavac npr. to rade. Njene ruke i noge su takve građe da nježno i brižno dodiruju stablo ili cvijet biljke, tako da ni na koji način ne pravi štetu. Još jedna odlika ovog čudnovatog Allahovog stvorenja jeste da nikada nikog ne napada prva. Pčela napada samo onoga ko želi nju da povrijedi. Ako se osjeća ugroženom od strane drugih životinja ili ljudi, pčela će prvo zujanjem upozoriti potencijalnog napadača, pa tek onda napasti. S druge

strane, opet imamo suprotan primjer kod ose, koja napada i zbog najmanjeg pokreta ili zvuka.

### **Posebnosti pčele koje nisu spomenute u hadisu**

Pčela uporno radi i trudi se, tokom čitavog dana gradeći svoje ćelije (saće), a time i čitave gradove. Zatim, pčela veliki trud ulaže i na čuvanju i pomaganju svojih potomaka. U zaštiti potomaka, pčele pokazuju zavidnu hrabrost, napadajući mnogo veće i jače protivnike. Slijedeća stvar koja pčelu izdvaja i uzdiže u odnosu na druge životinje jeste ljubav za timskim (džematskim) radom. Treba li napominjati da je jak i kompaktan džemat jedna od osnovnih stvari za napredak i uspjeh vjernika, kako na dunjaluku, tako i na ahiretu?! Slijedeća pohvalna osobina pčele jeste da ona nikada ne izbjegava posao ili se buni zbog teškoće. Naprotiv, Allah ju je stvorio takvom da štiti i radi, ne očekujući ničiju pohvalu niti posebno mjesto u svojoj ćeliji. Nakon što smo saznali ove pojedinosti, sasvim nam je jasno, zašto je Allahov Poslanik, sallallahu alejhi ve sellem, uporedio vjernika sa pčelom, opisujući sve te lijepe osobine pčele, zaključujemo da su to, ustvari, osobine dobrog i korisnog vjernika.

### **Svojstva vjernika u usporedbi sa pčelom**

Vjernik je dobar čovjek! Trudi se da jača iman u svome srcu, a svoje strasti sputava i upražnjava samo na halal način.

Takvim odnosom prema svojim strastima vjernik je izvor svakog dobra, kako za sebe, tako i za druge ljude, uopšteno. Zato, vjerničko srce ne prihvata ništa osim onoga što mu je Allah dozvolio, pa je njegova zarada i kompletna nafaka halal i dobra, njegov govor je čist i lijep, njegova djela su dobra, njegovi ibadeti su puni bogobojažnosti i smirenosti, njegova hrana koju jede je halal, piće koje pije je halal, odjeća koju nosi je halal. Nakon svih ovih dobrih osobina vjernika, koje je imao na dunjaluku, on zaslužuje da mu se na Sudnjemu danu kaže: "Mir vama, od grijeha ste čisti, zato uđite u njega, u njemu ćete vječno boraviti." (Ez-Zumer, 73).

A Džennet je prebivalište samo dobrih vjernika koji će ući u njega. Zatim, vjernik neće drugima dati ono što ne želi sebi, poput pčele koja pravi tako ukusan, sladak i prije svega koristan med, a potom ga koriste ljudi. Dakle, ako se nešto uradi ili napravi dobro, ono koristi drugima. Ako čovjek svojim znanjem uradi neko dobro sa iskrenim nijetom, to dobro će ostati i poslije njega koristeći narodu, a samim tim i njemu na Sudnjemu danu. Osobina pčele jeste i to da ona nikada ne slijeće na strvinu, niti na bilo kakav izmet, prenoseći njegove prljave tragove i neugodne mirise. Isto tako, vjernik ne odlazi na mjesta grijeha, harama, tame, niti govori ono što je ružno, niti prenosi tuđe riječi ili potvore. Zatim, kako pčela, tako i vjernik, ne gleda da li još neko radi ili neradi, vjernik uvijek radi i u svakom momentu je na usluzi svojoj zajednici. Nikada ne troši svoje vrijeme na nebitne

stvari, poput analiziranja tuđih postupaka, nego se trudi da što više radi na ličnom napredovanju u svakom pozitivnom smislu. Pčela, putujući od svoje ćelije do cvijeta, nikog ne uznemirava niti ikom pravi probleme, baš kao vjernik koji gleda samo svoja posla i ostavlja ono što ga se ne tiče, kao što Poslanik, sallallahu alejhi ve sellem, opisuje potpunog vjernika. Već smo spomenuli da je pčela životinja koja voli zajednicu i koja sama ne može živjeti. I u ovoj osobini pčele ćemo prepoznati vjernika! Vjernik mora da živi u muslimanskom džematu, u suprotnom, bude li se odvojio od džemata, njegov iman vremenom će oslabiti, a zatim će potpuno propasti. Stoga, vjernik je taj koji radi poput pčele da svoj džemat učini što boljim i kvalitetnijim, i to prvo izgrađujući sebe i svoj iman, jer izgradnjom sebe, mi izgrađujemo kompletan džemat! Uzmimo sebi za primjer pčelu i njene osobine koje smo nabrojali, kao vodilju kroz naše živote!



# POŠTIVANJE EHLU BEJTA



Uzvišeni Gospodar iz Svoje apsolutne i savršene mudrosti odlikovao je neke ljude nad drugim ljudima. Jednima je dao posebne počasti i uzvisio ih nad ostatkom ljudskog roda. Poslanik Muhammed, sallallahu alejhi ve sellem, najodabraniji je i najčasniji od svih ostalih poslanika. Kur'an za njegov moral veli: "Ti si (o Muhammede), doista, na najuzvišenijem stupnju morala." (El-Kalem, 4.) Onaj koji posjeduje najuzvišeniji moral nesumnjivo je najdostojniji da odgoji najčasniju porodicu, koja je ikad kročila dunjalukom. Ta najsavršenija i najodgojenija porodica jeste Poslanikova, sallallahu alejhi ve sellem, porodica (Ehlul-bejt, Alu-Muhammed).

## Ko su pripadnici ehlu-bejta?

Postoji više mišljenja, kod Ehlul-Sunneta, po pitanju definicije Ehlul-Bejta od kojih je najpoznatije da su Ehlul-Bejt oni kojima je zabranjena sadaka (milostinja) tj. Benu Hašim i Benu Muttalib, tako da u njih ulaze Poslanikovo, sallallahu alejhi ve sellem, potomstvo i supruge.

Dokaz da je Poslanikovo, sallallahu alejhi ve sellem, potomstvo od Ehlul-Bejta je hadis kojeg prenosi plemeniti Poslanikov, sallallahu alejhi ve sellem, ashab Sa'd ibn Ebi Vekkas, radijallahu anhu, da je rekao: "Allahov Poslanik, sallallahu alejhi ve sellem, jednom



prilikom, kada mu je spuštена objava, uzeo je Aliju, njegova dva sina (Hasana i Husejna), te Fatimu, radijallahu anhum, te ih ogrnuo svojom odjećom, a potom je rekao: - Gospodaru, ovo je moja porodica i moj ehlul-bejt!"(Hadis je sahih ).

Shodno ovome hadisu, a i mnogim drugim predajama zaključujemo da u okviru ehlul-bejta mimo Poslanika, sallallahu alejhi ve sellem, ulaze četiri osobe: Alija, Fatima, Hasan i Husejn, radijallahu anhum. No, ehlul-bejt nije ograničen isključivo na prethodno spomenute osobe, već i Poslanikove, sallallahu alejhi ve sellem, supruge ulaze u okvire ehlu-bejta, na što jasno ukazuje sljedeći kurvanski ajet.

Naime, pojam ehlul-bejt u kontekstu govora o Poslanikovoj, sallallahu alejhi ve sellem, porodici spomenut je u suri Ahzab u 33. ajetu. Ajeti koji prethode ovom ajetu kao i oni koji dolaze poslije u cjelosti govore o Poslanikovim, sallallahu alejhi ve sellem, suprugama. Uzvišeni Allah kaže: "I boravite u kućama svojim

(o žene Vjerovjesnikove), i ljepotu svoju, kao u davno pagansko doba, ne pokazujte, i namaz obavljajte i zekat dajte, i Allaha i Poslanika Njegova slušajte! Allah želi da od vas, o ehlu-bejt, grijehe odstrani i da vas potpuno očisti." Tumačeći posljednu rečenicu ovog ajeta Ibn Kesir spominje da su ove riječi Allaha Uzvišenog jasan šerijatski tekst koji ukazuje da žene Allahovog Poslanika, sallallahu alejhi ve sellem, ulaze u sastav ehlul-bejta. One su povod objave ovog ajeta, a povod objave ulazi u objavu, u vezi s čim postoji potpuna saglasnost među ulemom.

### **Odluke i vrijednosti pripadnika ehlu-bejta**

Zejd ibn Erkam prenosi hadis u kojem stoji da je Allahov Poslanik, sallallahu alejhi ve sellem, rekao: "Ja vam ostavljam dvije velike stvari: prva je Knjiga Uzvišenog Gospodara, u njoj je uputa i svjetlo, pa je prihvatite i čvrsto je se pridržavajte! Zatim je podsticao na pridržavanje i razvijanje ljubavi prema Allahovoj Knjizi, a potom je rekao: - I druga stvar je moj ehlu-bejt. Podsjećam vas na Allaha u pogledu mog ehlu-bejta!( tj. predavanje pažnje njima, davanje njima njihovi prava i njihovo poštivanje) Podsjećam vas na Allaha u pogledu mog ehlu-bejta! To je ponovio tri puta." (Muslim) Kao što se iz hadisa jasno vidi, Poslanik, sallallahu alejhi ve sellem, nam je u emanet ostavio da se brinemo za njegov ehlu-bejt i da ih volimo, te da im poštovanje iskazujemo. A kako i ne bismo kada je Poslanik, sallallahu



alejhi ve sellem, za svoju kćerku Fatimu, radijallahu anha, kazao: “O Fatima! Zar te ne čini zadovoljnom to što si najbolja među ženama vjernika, ili najodabranija žena ovoga ummeta?” (Muttefekun alejhi) Za svoga zeta i amidžića Aliju, radijallahu anhu, je kazao: “Ti (o Alija) si od mene i ja sam od tebe.” (Buhari) U hadisu kojeg prenosi Usame ibn Zejd stoji da je Vjerovjesnik, sallallahu alejhi ve sellem, za Hasana i Husejna, radijallahu anhu, rekao: “Ovo su sinovi moji, i sinovi moje kće-ri; Moj Allahu, zaista ih ja volim pa neka su Tebi dragi i neka Ti je drag onaj ko njih voli.” (Hadis je sahih)


### Ehlu-sunneta i ehlu-bejta

Kao što je evidentno iz prethodno citiranih predaja vrijednost ehlu-bejta je doista velika, a njihov položaj je poseban. Stoga je stav i uvjerenje pripadnika ehlu-sunneta da je poštovanje i iskazivanje ljubavi prema pripadnicima ehlu-bejta obaveza. Pripadnici ehlu-sunneta u ovoj obavezi svakodnevno ustrajavaju spominjući Poslanikovu, sallallahu alejhi ve sellem, porodicu na svakom namazu učeći: „Allahume salli ala Muhammedin ve ala ali Muhammed...” Riječi <ali Muhammed> označavaju Poslanikovu, sallallahu alejhi ve sellem, porodicu.


Neosporavajući položaj i mjesto koje pripada pripadnicima ehlu-bejta, pripadnici ehlu-sunneta svoje vjerovanje u pogledu njih baziraju na temeljima jasnih predaja i tako ne pretjeruju u pogledu iskazivanja

ljubavi i poštovanja prema njima. Mi ih volimo i poštujemo u granicama Kur'ana i sunneta, bez pretjerivanja i prepisivanja njima onoga što im ne pripada, niti su oni sami to prizivali sebi. Naše vjerovanje u pogledu ehlu-bejta mora biti umjereno, bez pretjerivanja, ali u isto vrijeme položaj i značaj ehlu-bejta ni po koju cijenu ne smije biti zanemaren i zapostavljen.

Ako se želimo približiti Allahu i sebi priskrbiti nešto od prefinjenog ahlaka i morala, kojeg je posjedovala najodgojenija i najčasnija porodica, onda se neminovno moramo posvetiti iščitavanju literature koja govori o njihovim životima. Porodica, koju je lično odgojio Poslanik, sallallahu alejhi ve sellem, zasigurno odiše najprefinjenijim i najposebnijim svojstvima koja ćemo apsorbirati jedino ako se pobliže upoznamo s odlikama i posebnostima ehlu-bejta.



# Vrijednosti poslanikovi drugova – ashaba



**D**rug Božijeg Poslanika (ashab) je svaki onaj koji je sreo Vjerovjesnika, sallallahu alejhi ve sellem, povjerovao u njega i umro kao musliman. Mnogi Kur'anski ajeti i vjerodostojni Poslanikovi, sallallahu alejhi ve sellem, hadisi, ukazuju na vrijednost njegovih drugova, obaveznost njihovog poštivanja i zabranjenost njihovog vrijeđanja.

Uzvišeni Allah je rekao za ashabe da su najbolji narod, odabrana zajednica, da je zadovoljan sa njima, a sa kime Allah bude zadovoljan, to mu osigurava predivnu završnicu, jer se Allah više neće na njega rasrditi, jer On poznaje nepoznato, budućnost, zna sa kime će biti zadovoljan, a Allah Svoje obećanje nikad ne krši.

Rekao je Uzvišeni Allah : “Vi ste najbolji narod koji se ikada pojavio.” ( Alu Imran, 110) I kaže: “Tako smo vas učinili zajednicom sredine.”( El-Bekara, 143) i :“Allah je zadovoljan onim vjernicima koji su ti se pod drvetom na vjernost zakleli. On je znao

šta je u srcima njihovim, pa je spustio smiraj na njih, i nagradit će ih skorom pobjedom.”( Feth 18 ) I kaže: “Allah je zadovoljan prvim muslimanima, muhadžirima i ensarijama, i svima onima koji ih slijede dobra djela čineći. A i oni su zadovoljni Njime. Za njih je On pripremio džennetske bašče kroz koje će rijeke teći, i oni će vječno i zauvijek u njima boraviti. To je veliki uspjeh.” ( Tevbe ,100.)

Takoder Uzvišeni se obratio Svome Poslaniku: “ O Vjerovjesniče, Allah je dovoljan tebi i vjernicima koji te slijede.”( El-Enfal 64.) I pohvalio je sve ashabe, muhadžire i ensarije: “Muhammed je Allahov poslanik, a njegovi sljedbenici su strogi prema nevjernicima, a samilosni među sobom; vidiš ih kako se klanjaju i licem na tle padaju želeći Allahovu nagradu i zadovoljstvo – na licima su im znaci, tragovi od padanja licem na tle. Tako su opisani u Tevratu. A u Indžilu: oni su kao biljka kad izdanak svoj izbaci pa ga onda učvrsti, i on ojača, i ispravi se na svojoj

stabljici izazivajući divljenje sijača – da bi On s vjericima najedio nevjernike. A onima koji vjeruju i dobra djela čine Allah obećava oprost i nagradu veliku.” ( Feth , 29) I kaže : “Kad su nevjernici punili svoja srca žarom, žarom paganskim, Allah je spustio smirenost Svoju na Poslanika Svoga i na vjernike i obavezao ih da ispunjavaju ono zbog čega će postati pravi vjernici – a oni i jesu najpreči i najdostojniji za to – a Allah sve zna.” ( Feth , 26) I kaže: “Oni koji vjeruju i iseše se, i bore se na Allahovom putu, i oni koji daju sklonište i pomažu – oni su, zbilja, pravi vjernici – njih čeka oprost i obilje plemenito.” ( Enfal , 74) I kaže: “I siromašnim muhadžirima koji su iz rodnog kraja svoga protjerani i imovine svoje lišeni, koji žele od Allaha dobro i zadovoljstvo steći, i Allaha i Poslanika Njegova pomognu, to su, zaista, pravi vjernici i onima koji su Medinu za življenje izabrali i domom prave vjere još prije njih je učinili; oni vole one koji im se doseljavaju i u grudima svojim nikakvu tegobu, zato što im se daje, ne osjećaju, i više vole njima nego sebi, mada im je i samima potrebno. A oni koji se ušćuvaju lakomosti, oni će, sigurno, uspjeti.” ( Hašr 89-) I kaže: “Allah je oprostio Vjerovjesniku, i muhadžirima i ensarijama, koji su ga u teškom času slijedili, u vrijeme kada se srca nekih od njih zamalo nisu pokolebala; On je poslije i njima oprostio, jer je On prema njima blag i milostiv.” ( Tevba, 117.)


Isto tako Allahov Poslanik, sallallahu alejhi ve sellem, nam je zabranio da ih vrijeđamo: “Ne vrijeđajte moje ashabe! Ne vrijeđajte moje ashabe, jer tako mi Onoga u Čijoj je ruci moja duša, kada bi neko od vas podijelio zlata koliko brdo Uhud, ne bi dostigao njihov pregršt ili šaku.” (Muslim) i kaže, sallallahu alejhi ve sellem: “Ko vrijeđa (psuje) moje drugove neka je na njega Allahovo prokletstvo, prokletstvo meleka i svih ljudi!” ( Hadis je hasen).

Rekao je Abdullah ibn Omer, neka je

Allah sa njime zadovoljan: Ne vrijeđajte (ne psujte) drugove Muhammeda, alejhi selam, zaista je njihovo djelo jedan sat bolje od djela cijeloga života jednoga od vas». (Hadis je hasen)

Također je rekao da su najbolja generacija ljudi: “ Najbolja generacija jeste moja generacija, a potom generacija poslije njih ...” ( Buhari). I nagovjetio je da će se njegov umet podijeliti na sedamdeset i tri skupine i da će sve u vatru osim jedne i pojasnio je da je ta jedna skupina: “Ono na čemu sam ja i moji drugovi – ashabi.” ( Hadis je hasen)

Rekao je Poslanik, sallallahu alejhi ve sellem, pojašnjavajući vrijednost svojih drugova: “Doći će vrijeme ljudima u kojem će se boriti pojedine grupe ljudi i reći će : «Da li ima među vama neko ko je Poslanikov drug ? Reći će : “Da”, pa će osvojiti. Potom će doći vrijeme ljudima u kojem će se boriti pojedine grupe ljudi i reći će : “Da li ima među vama Poslanikov drug ?” Reći će : “Da”. Pa će osvojiti. Potom će doći vrijeme ljudima u kojem će se boriti pojedine grupe ljudi i reći će : “Da li ima među vama Poslanikov drug ? Reći će : “Da”. Pa će osvojiti.” (Buhari) I kaže: “Zvijezde su sigurnost za nebesa i kada nestanu dođe nebesima ono sa čime im se prijeti, ja sam sigurnost mojim drugovima i kada otidem doći će im ono sa čime im se prijeti, moji drugovi su sigurnost mome umetu i kada otiđu doći će im ono sa čime im se prijeti” (Muslim)



# DA LI VOLIŠ BOŽIJEG POSLANIKA, SALLAHU ALEJHI VE VE SELLEM ?

**U** zvišeni Allah je odabrao Muhammeda, sallahu alejhi ve selem, između Svojih poslanika i vjerovjesnika i učinio ga najboljim među njima, kao što je sa njime i njegovom poslanicom zapečatio objavu na Zemlji i isto tako mu je pripremio najbolje mjesto na ahiretu.

Svaki musliman je obavezan da voli Božijeg poslanika, sallahu alejhi ve selem, jer se iman muslimana neće upotpuniti osim sa ljubavlju Poslanika: "Niko od vas neće u potpunosti vjerovati, sve dok mu ja ne budem draži od njegova djeteta, roditelja i svih ljudi" (Buhari i Muslim), s tim da postoje određeni znakovi koji ukazuju na iskrenost ljubavi muslimana

prema Božijem Poslaniku. U naredni nekoliko redova spomenut ćemo najvažnije znakove te iskrene ljubavi: 1- Čvrsto vjerovanje u Poslanika, sallallahu alejhi ve sellem, jer je to jedan od ruknova vjerovanja u sve Božije poslanike i vjerovjesnike koji su poslani ljudima. "Reci: "O ljudi, ja sam svima vama Allahov poslanik, Njegova vlast je na nebesima i na Zemlji; nema drugog boga osim Njega, On život i smrt daje, i zato vjerujte u Allaha i poslanika Njegova, vjerovjesnika, koji ne zna čitati i pisati, koji vjeruje u Allaha i riječi Njegove; njega slijedite – da biste na Pravome putu bili!" (El A'araf, 158) i rekao je Poslanik: "Naređeno mi je da se borim protiv ljudi sve dok ne posjedoče

da nema boga mimo Allah i da sam ja Božiji poslanik...” ( Muttefekun alejhi).

2- Ljubav prema Božijem Poslaniku, sallallahu alejhi ve sellem, jer nam je to naređeno Kur’anom i sunnetom. “Reci: “Ako su vam očevi vaši, i sinovi vaši, i braća vaša, i žene vaše, i rod vaš, i imanja vaša koja ste stekli, i trgovačka roba za koju strahujete da prođe neće imati, i kuće vaše u kojima se prijatno osjećate – miliji od Allaha i Njegova Poslanika i od borbe na Njegovu putu, onda pričekajte dok Allah Svoju odluku ne donese. A Allah grješnicima neće ukazati na Pravi put.” (Et-Tevbe, 24.) I rekao je Poslanik: “Tri stvari kod koga se nađu osjetit će slast imana: “Da mu Allah i Njegov Poslanik budu draži od svega mimo njih...” ( Buhari) Onaj koji zavoli Poslanika, dat će prednost onome što voli Poslanik nad onim što on voli, volit će ono sa čime je došao i čemu je pozivao, i volit će njegove ukućane Ehlu-Bejt i njegove drugove, voljet će onoga koga je volio Poslanik od njegove porodice, drugova- ashaba, muhadžira, ensarija. Iskazivati neprijateljstvo prema onima, prema kojima je Poslanik iskazivao neprijateljstvo, kao i mrziti one koje je Poslanik mrzio i koji su vrijeđali njegove miljenike, kao i braniti njegove miljenike i ponašati se shodno njihovoj praksi i sunnetu. Rekao je Poslanik, sallahu alejhi ve sellem: “Prdržavaj te se moga sunneta i sunneta pravedni halifa-vladara poslije mene...” ( Hadis je sahih). Također, musliman koji voli Poslanika, spominjat će ga često, poštivati ga i uvažavati, željno će čekati susret sa njime.

Na kraju, moramo znati da ljubav prema Poslaniku, dovodi do toga da Allah zavoli osobu koja voli Njegova Poslanika, sallallahu alejhi ve sellem.

3- Uzimanje Poslanika, sallahu alejhi ve sellem, za uzor, slijeđenje njega u njegovom govoru i radnjama, pridržavanje njegova sunneta, izvršavanje njegovih naredbi, ostavljanje njegovih zabrana, kako u lagodnom stanju tako i u poteškoćama, slijeđenje Poslanika u onome što volimo i ne volimo.

“Reci: “Ako Allaha volite, mene slijedite, i vas će Allah voljeti i grijehе vam oprostiti!” – A Allah prašta i samilostan je” (Alu Imran, 31) I kaže: “Vi u Allahovom Poslaniku imate divan uzor za onoga koji se nada Allahovoj milosti i nagradi na onome svijetu, i koji često Allaha spominje.” (Ahzab, 31.) I kaže: “O vjernici, pokoravajte se Allahu i pokoravajte se Poslaniku, i ne ništite djela svoja!” ( Muhammed, 33.) I rekao je Poslanik: “Cijeli moj ummet će ući u džennet, osim onih koji to odbiju. Rečeno je: O Božiji Poslaniče: “A ko to odbija” Rekao je: “Ko mi se pokori ući će u džennet, a ko mi bude ne pokoran, pa on je odbio” ( Buhari).

4- Pohvala Poslanika sa onim što mu pripada, a najbolja pohvala je, pohvala sa onim sa čime ga je pohvalio njegov Gospodar – Allah i sa onim sa čime je on sam sebe pohvalio, a najbolje od toga je donošenje salavata na njega. Zato što nam je to naredio Allah i potvrdio tu Svoju naredbu: “Zaista Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!” ( Ahzab, 56.) A Poslanik je rekao : “Škrt je

onaj kod koga se spomenem , pa ne donese salavat na mene” (Hadis je sahih) i kaze: “... Donesite salavat na mene, jer zaista ko donese na mene jedan salavat, Allah će donijeti na njega deset salavata zbog toga jednoga salavata.” (Muslim)

5- Traženje presude po sunnetu Božijeg Poslanika, sallallahu alejhi ve sellem.

“I tako Mi Gospodara tvoga, oni neće biti vjernici dok za sudiju u sporovima međusobnim tebe ne prihvate i da onda zbog presude tvoje u dušama svojim nimalo tegobe ne osjete i dok se sasvim ne pokore.” (En-Nisa, 65.)


6- Odbrana Poslanikova, sallallahu alejhi ve sellem, tako što ćemo njegov sunet zaštititi od podvale zlotvora, iskrivljavanja fanatika i tumačenja neznalica, kao i odstranjivanje sumnji - šubhi pokvarenjaka i pojašnjavanjem

njihovih laži.

7- Ponašanje prilikom spomena Poslanika, sallallahu alejhi ve sellem, u duhu islamske kulture i etike. Nećemo spominjati samo Poslanikovo, sallallahu alejhi ve sellem, ime Muhammed, već ćemo njegovo ime povezivati sa poslanicom i vjerovjesništvom, pa ćemo govoriti Božiji Poslanik, Božiji Vjerovjesnik i to ćemo mnogo spominjati u pohvalnim situacijama. “Ne smatrajte Poslanikov poziv upućen vama kao poziv koji vi jedni drugima upućujete...” ( Nur, 63)

8- Širenje Poslanikova, sallallahu alejhi ve sellem, sunneta među ljudima i podučavanje ljudi sa njime. Rekao je Poslanik “Dostavite od mene , pa makar jedan ajet.” ( Buhari i Muslim )





Molimo Uzvišenog Allah,  
sa Njegovim lijepim imenima  
i uzvišenim osobinama, da primi  
vaš hadždž, umru, namaz, stajanje na  
Arafatu, boravak na Muzdelifi, bacanje  
kamenčića, sadaku i sva učinjena dobra djela  
i molimo Ga da ih učini na vagi Vaših dobri  
dijela i da ih nađete zapisane u vašoj knjizi na dan  
kada sretnete svoga gospodara a On, ako bog da ,  
.zadovoljan sa vama

Molimo Uzvišenoga Allaha da Vaš hadždž učini  
mebrurom-primljenim za kojeg nema nagrade osim  
.dženneta

Molimo Uzvišenog Allaha da vam olakša povratak  
vašim porodicama i imecima i da ih nađete u  
.svakom dobru

Molimo Uzvišenog Allaha da vam omogući  
da mnogo puta posjetite svetu Mekku  
Mukarremu i Medinu Munevveru i da  
mного puta obavite hadždž i umru  
, a Alah je u mogućnosti da to  
.omogući

Možete nas kontaktirati putem internet  
stranice časopisa Zemzem

**[www.zamzammk.com](http://www.zamzammk.com)**



Ili putem email adrese

**[zamzam.mk@gmail.com](mailto:zamzam.mk@gmail.com)**